















PROCES
VERBAL
DE LA
REVOLTE

1614

FAICTE PAR MESSIEVRS

de Poictiers à leur Gouver-
neur, Monsieur le Duc
de Roannes.

ENVOYE' A SA MAIESTE'

1614.

Case

F

39

.726

161420

THE METROPOLITAN
LIBRARY

PROCES VERBAL DE LA
REVOLTE FAITE PAR MESSIEURS
de Poictiers, à leur Gouverneur, Monsieur
le Duc de Roannes.

Enuoyé à sa Majesté.

LE 25, Iuin 1614. j'arriuay en la ville de Poictiers, & y feus receu par le Maire, & les Escheuins, & Bourgeois qui me cōduirent à mon logis, où y estant fus prié par le Maire de souper à son logis, avec lesdits Escheuins, & le Sr. Londigny Frezeliere, Lieutenant criminel, depuis esleu maire: estant prié de m'y achēminer, Mr. l'Euesque de la ville me vint trouuer, & me pria d'oublier les choses passees, & les entreprises qu'il auoit fait sur ma charge, ce que ie luy accorday fort volontiers, & le pryay de n'y plus entreprendre à l'aduenir, & en l'allant cōduire ie le trouua y qu'il estoit assisté de ôze caualliers ayāt le pistolet à l'arçon de la selle, & quelque 40. hommes de pied, ayant chacun la carrabine dessous le manteau, & conduits par le nōmé Bourbeau, sergēt de la compagnie de l'Abbē de nostre Dame, & estant à souper avec lesdits Maire & Escheuins, d'autant qu'a mon arriuee j'auoy trouuē toutes les rües barriquadees. ie re

solus avec eux, & ledit Lieutenant Criminel &
 gentils-hommes cy dessus mentionnez, de faire
 publier des deffences à toutes personnes de nō
 faire barriquades à l'aduenir, & ne tendre les
 chaisnes sans mon commandement, & enjoit
 à tous ceux qui auoient barriquades pres ou de-
 uant leurs maisons de les deffaire ou oster, & en
 cas d'allarme de ce rendre à la porte qui leur se-
 roit escheuë ou en sondit quartier pour y rece-
 uoir mesdits commendements: ce qui fut pu-
 blié le leudy matin 26. dudit mois, & receu en
 tres bonne part de tous les gens de bien, & l'a-
 presdisnée fus visiter ledit sieur Euesque, ou
 estant fut aduisé entre luy & moy & le sieur de
 la Quielle que i'assemblerois a mon logis les
 sieurs de Sainte Marthe Tresorier & Maire, le
 sieur de S. Clair avec ledit sieur de la Quielle à
 fin d'enuoyer vers Monsieur le Prince le sieur
 de la Ialletiere qui y estoit le iour precèdent de
 la part de ceux de la ville, auquel il auoit pro-
 mis de ne se presenter pour entrer en jadite vil-
 le iusques à ce que sa Majesté en eust ordonné,
 & parce que l'on voyoit que ledit sieur Prince
 s'approchoit de ladite ville à vne lieuë pres, cō-
 me i'eus despesché le sieur de Sainte Marsolle
 auquel il fit mesme promesse, vient vers moy le
 sieur de Rouuré de la part dudit sieur Euesque

pour me dire que ie fisse fermer la porte de S. Cipryan, auquel ie fis respōce que ie ne jugeois pas à propos de la faire fermer pour ce qu'il n'estoit que trois heures, mais que i'y donnerois si bon ordre qu'il n'en arriueroit aucun inconuenient, & que mesme i'y auois enuoyé le sieur Cheuallier l'un des Cappitaines de ladicte ville, auquel ladicte porte estoit escheuë cedit iour, lors ledit Rouuré me dist que le peuple murmuroit & se vouloit esleuer, ce que voyant ie m'acheminay à la porte de Saint Cyprien avec lesdits sieurs de la Quielle, Brochard, de Saint Clair Procureur du Roy & le Sergent Major de ladicte ville, & par les chemins, ie n'apprecus aucun soufleuement de peuple: mais approchant de ladicte porte ie rencontray le nommé Berland, homme factieux & seditieux, qui alloit pour faire sous-leuer le peuple: mais il fut retenu par ma presence, & se retira: estant à ladite porte i'ay trouué ledit cheualier, avec 50. ou 60. de ses compagnons, & luy enjoit derechef de prendre garde à ce qui se passeroit, & mettre de bone sentinelle hors la ville. Et moy retournant vers mon logis; ie trouuay homme qui me dist que l'on'armoist vers l'Euesché, au quartier dudit Abbé de nostre Dame, où m'acheminant avec ledit de la Quielle, & sergent Ma-

jor, ledit de saint Clair ne m'y allant voulu assis-
 ter; se doutât bien qu'il m'y arriueroit du mal,
 & de fait estant deuant la porte dudit Euesché
 ie trouuay qu'on auoit tendu les chesnes, & mis
 les cadenarz à icelles, & voyant plusieurs hom-
 mes armez, i'allay à eux & leur demanday pour-
 quoy ils s'armoient & tendoient les chesnes, ils
 me dirent qu'ils voyoient plusieurs caualliers
 hors la ville & pres les fauxbourgs, ie leur fit res-
 ponce que ie venois dehors la ville, & n'auois
 veu personne qui leur peust mes faire, & que
 quand ainsi seroit qu'estant leur gouuerneur ie
 voulois mourrir avec eux, & estre le premier à
 m'opposer cōtre ceux qui voudroiet entreprē-
 dre sur la ville, & que ie ne iugeois pas qu'il y eust
 apparēce de prendre les armes, & qu'il falloit
 vser de plus de moderation, & que i'auois plus
 d'affectiō pour eux que pour moy-mesme, & à
 mesme tēps rēcōtray celuy qui posoit ledits ca-
 denars esdites chesnes, auquel ie fis inioinctiō
 de les ouurir, & de fait ie fis destendre lesdites
 chesnes en quatre endroits, qui sont les quatre
 aduenties dudit Euesché, & ayant esté aduertey
 par le chanoine nommé Esnet, que le sieur de la
 Sigongne, l'un des six capitaine, & auquel i'a-
 uois mēdé quelque temps auparauant par le-
 dit sergent Major, qu'il n'eust à abandonner la

porte du pont Ioubert, à laquelle ledit sergent
 Major l'auoit trouué, & qui luy estoit escheuë
 ledit iour: & qui toutesfois mesprisâmes com-
 mendements, il l'auoit quittée & auroit tiré
 hastiuement vers l'Euesché: ie m'acheminay à
 ladite porte, où estant ie trouuay que l'on auoit
 abattu le rateau, combien qu'il y eust cinquâte
 soldats, & l'un des sergens de la compagnie nô-
 mé la Haye, auquel ayant demandé pourquoy
 il auoit fait abattre ledit rateau, veu les deffen-
 ces que i'auois fait faire, il me dist que c'estoit
 la coustume, & l'ayant enquis pourquoy son
 Capitaine auoit abandonné ladite porte, il me
 fit responce que ledit sieur Euesque l'auoit mē-
 dé à grande haste, ie leur fis quelques remon-
 strances, & les pria de se comporter à l'aduenir
 modestement, avec les mesmes protestations
 que dessus, & m'estant mis dans le carrosse du-
 dit sieur de la Quielle, qu'il auoit enuoyé que-
 rir pendant que i'estois à ladicte porte, ie voulus
 retourner par deuers ledit Euesché, & voir si le
 peuple estoit encore armé, attēdu que ie leur a-
 uois enjoint de se desarmer, & faire destēdre les
 chesnes, lesquelles ie trouuay de rechef tēduës
 & cadenattées & ledit sieur de Rouure qui vint
 au deuant de moy me disant de rechef, & pour
 la troisieme fois, que ledit Sr. Euesque ne pou-

uoit plus retenir le peuple, lors ie le priay de faire ouurir les cadenats desdites chesnes pour faire passer le carrosse, i'enuoyay audit Euesché querir les clefs desdits cadenats, qui furent fort lōg tēps à venir, & ē fin m'ayāt ledit Sr. Euesque enuoyé lesdites clefs, & ouverture estant faite, les chesnes abattuës, le carrosse passe iusque deuant la porte dudit euesché, lors ie priay ledit de la Quielle de metre pied à terre, & aller trouuer ledit Sr. Euesque, de ma part, & luy dire que ie trouuois mauuais de ce qu'on faisoit rendre lesdites chesnes, & faisoit armer tout le peuple, à mesme tēps qu'il fut dessendu du carrosse voyāt quātité d'hōmes armez, i'ay cōmencé à leur remonstrer qu'ils faisoient mal de s'armer si legeremēt, & que le seruice du Roy n'estois pas de viure en ceste forme, mais qu'aux alarmes qui venoient il falloit simplement ce rendre à son quartier, & garnir les murailles & portaux, sans vser de forme si violante & seditioneuse, cōme de rendre les chesnes & faire barriquades, encores moins de sonner le tocsaing, vn soldat de la trouppes estant au milieu de la presse respondit qu'on ne laisseroit pas de le faire nonobstant mes ordonnances, & ayant demandé qui estoit ce mutin qui parloit tous ce tournerent vnanimement, & à l'instant veit sortir vne

tir vne quantité d'autres soldats dudit euesché,
 ayans picques, mousquets & arquebuses, & lors
 entendit dire à haute voix, voicy les traites, &
 en mesme temps le tocsain sonna, & me fut tiré
 plusieurs coups de hallebardes, & picques, que
 les miens parirēt, & mesmes ledit Sr. de la Qui-
 elle, & les Srs. de Chamonsseau, & Messeuiere,
 en parirent leur part, & ne sceurent si bien faire
 que ie ne feusse vn peu touché sur le nez, dont
 le sang enforty, me fut tiré quatre coups de
 pistolets, qui Dieu merci ne s'en allerent point,
 & feirent seulement faux feu, & a l'instant fut
 conduit par ledit Sr. de la Quielle, Chamons-
 seau Abbé de nostre Dame, lequel Abbé de
 nostre Dame estoit sorti dudit Euesché, où e-
 stant ietté par la multitude du peuple qui y e-
 stoit, ie trouuay en teste ledit Sr. Euesque, armé
 d'une cuirasse, & d'une picque à la main, & luy
 dit, quoy Mr. quelles façons de faire sont ce cy
 que d'assasiner les gens de bien, & ceux qui ont
 l'honneur d'estre ce que ie suis, encores sans su-
 iet ny aucune apparence? où à on pris à ser-
 uir le Roy de la façon? il me semble que ce ne
 sont pas les formes, là dessus quelque quatre
 vingt ou cent cinquante qui estoient armez en sa-
 cour, au euluy, me voulurent quereller, & me dirēt
 qu'ils n'estoient pas gens à souffrir les ordonnā-

ces que l'on leur feroit entendre, finō que celles
qu'ils auoient acoustumē: & lors vn de mes
amis s'approcha de moy, & me dist à l'oreille
que ie me retirasse en vne sale haute; & par la-
se peut, autrement qu'il me pourroit mes adue-
nir; auquel lieu estans tous les principaux de
la ville, ausquels ils estoit permis d'aller audit
Euesché: me vindrent trouuē pour me tesmoi-
gner l'extreme desplaisir qu'ils auoient de l'of-
fēce que i'auois reçue, & ē haussioēt les espaul-
les ne pouuant, peut-estre, dire librement ce
qui leur en sembloit. Et pour le regard dudit
sergent Major, ne voulut n'y ne peut me suiure
audit Euesché, pource qu'il n'y faisoit pas seur
pour luy, & se retira, à grand peine, dans la vil-
le, & non sans hazard, pour donner aduis du
tout au Maire, m'oubliant de dire que tous les
principaux de la ville s'offroient fort à moy, di-
sant que tous les gens de bien mourroient avec
moy, plustost que ie recusse de desplaisir, rel-
lement que ie fus contraint de souper là dedās,
& fus iusques à vne heure apres minuit es-
perant tousiours qu'on me laisseroit retourner à
mon logis; ce que ie ne peus iamais obtenir
n'ayāt pas vn de mes amis particuliers; à qui ie
peusse faire demander seurētē au peuple, pour
m'y en aller coucher, car tous ceux qui estoient

amis de l'Euesque me dissuaderēt, & disoiēt que le peuple ne le vouloit pas; & qu'il n'y auoit seur-
 reté pour moy que là dedās ce qu'il semble que
 i'estois obligé de croire, d'autant que le Sergēt
 major ayant par mon commandement aduer-
 ty les Capitaines des six compagnies, de faire
 trouuer deux escoliades de chacune cōpagnie
 à la place publique du marché vieil, afin de leur
 faire entendre l'intention de sa Majesté, & la
 forme qu'ils deuoient garder, pour vilement
 faire son seruice: Le Sieur Pidoux accesséur l'vn
 des six Capitaines luy respondit que cela ne se-
 roit point, & que ledit sieur Euesque n'estoit
 mis en ladite ville que pour dire son Breuiare
 & faire son office d'Euesque seulement, ains
 pour gouverner la Ville & executer ce qu'il a-
 uoit de commission particuliere, y adjousta le
 ledit Pidoux accesséur en presence mesme du
 Sieur Maire en pareils & semblables mots, tout
 le monde croyoit que Mōsieur le Gouverneur
 deust monstrier le pouuoir particulier qu'il a de
 la Royne de nous commander, mais puis qu'il
 ne l'a point fait voir au corps de Ville, ny apor-
 té lettres de la Majesté, l'on n'estoit pas résolu
 de luy rendre grāde obeissance: lors ledit Sieur
 Maire & Sergent major luy remonstrent que
 puis que nostre pouuoir auoit esté vne fois pu-

blié & enregistré au Greffe, & nous receu & in-
 stalé en ladite charge, qu'il ny auoit point de
 besoin de nouuelles lettres non plus qu'a luy
 d'autres lettres pour le faire recognoistre acces-
 seur, & de fait, ie recogneuz les effets, car en-
 uiron sur la minuit vient me trouuer vn Procu-
 reur de Ponts, nommé Benjamin Esnard accō-
 modé en Sergēt accōpagné de quelque vingt
 mousquetaires & quelques haliebardiens, les-
 quels furent trouuer ledit Sieur Euesque pre-
 mier que de venir parler a moy, apres vient en
 ladite salle, & me dist ces mots : Monseigneur,
 ie viens de la part de deux mille hommes de ce-
 ste Ville, lesquels sont bien marris de la fortu-
 ne qu'auiez couruë, ils s'offrent à vous pour vo-
 stre conseruation, sçachant bien qu'estes bon
 seruiteur du Roy & leur Gouverneur, neant-
 moins ils desirent vour obeyr soubs l'autorité
 de Monsieur de Poitiers, & que ne vous mes-
 liez plus de faire de banc dans la Ville, ils sont
 vos seruiteurs & vous recognoistront, desirāt
 toutesfojs seruir le Roy a leur fantasie, c'est à
 sçauoir de tendre les cheisnes quand bon leur
 semblera au son des tembourgs de Mondit Sei-
 gneur de Poitiers, qui sōt les cloches, disāt en-
 cores qu'il y a des traistres dans la ville, du cōseil
 de quels ils ne veulent plus que vous vous ser-

uiez ny les appelliez encores, quelques vns ont
 les principale charge, & que nostre petit Sire le
 Roy auoit du bec sur son manteau, duquel for-
 ce monde se vouloit couvrir & qu'ils ne le vou-
 loient pas souffrir, & continuant les indignitez
 que l'on m'auoit commencées, l'on fist monter
 vn se disant escollier nommé Boux, & qui estoit
 à l'assassinat du Sieur de Larrie, lequel accom-
 pagné de nombre d'escolliers & autres peuples
 & en presence dudit Sieur Euesque me dist a-
 uec blasphemés quâtité de parolles inséblâ-
 res & ridicules pour essayer de m'esmouuoir &
 faire parler, mais prattiquant le conseil & le
 voyant des auteurs de la sedition, & que ledit
 Sieur Euesque ne luy faisoit aucunes repriman-
 des, ie me teuz, resolu de souffrir toutes sortes
 d'opprobres & insolences, n'ayant avec moy
 que quatre Gentils-hômes qui estoient a moy
 armez seulement de l'espee qu'ils auoient au
 costé contre cinq cens personnes de la Ville
 qui estoient audit Euesche, & pour parfaire
 l'œuure, l'on me fist retirer dans vne Chambre
 pour me coucher, bien que i'incitasse de retour-
 ner à mon logis, où la on mit a ma porte deux
 sentinelles & vn corps de garde au pied de l'es-
 callier, vn autre au jardin ou les fenestres de ma
 chambre regardoient & entendis par ceux qui

les posoient, que si quelqu'un paroïssoit par les fenestres de madite chambre, quel'on le tirast, & deux autres corps de garde, l'un de la cour dans la cour de l'Euesque, & l'autre a la porte dudit Euesché: le lendemain sur les huit où neuf heures ie demanday à sortir hors la Ville, jugeant ny pouoir plus rendre de seruice à sa Majesté, me voyât reduit à telle extremité par les artifices dont l'on est constumier d'vser en ceste Ville là, où on ne parle plus que d'assassiner & poignarder les personnes, en toutes lesquelles choses le Sieur de la Vacherie Conseiller au Parlement à esté present & de fait pour ma seureté: ie fus conduit apres par le Sieur de la Quielle, Brochard, de la Lande, Mesnay Tresorier de France, Frezeliere, Londigny, le Cheuallier de Fressuis & autres, & bien me print d'estre à pied, d'autât que les baricades estoïent en toutes les ruës, & passay souz la faueur de ceux qui me conduisoïent, & ose asseurer sa majesté que si l'on m'eust laissé cōduire l'affaire suivant le commandement que i'auois, que i'eusse remis le tout au point que sadite Majesté desiroit, car i'auois jà commencé à disposer les volontez d'un chacun à un mutuel accord & concorde & au peu de temps que ie fus à ladite Ville, ie fis cesser les brigues de la Mairie, & oster

l'esperoir aux deux pretendās pour eslire le Sieur
Lieutenant Criminel, l'ayant confirmé que l'in-
tention de leurs Majestez estoit que pour ceste
annee il fust Maire, à quoy tous se resolurent
d'un consentement si unanimement que pas v-
ne voix ny billet ny fut au contraire, & eusse
aussi facilement accordé leurs particulieres
comme ie fis la brigue de la Mairie, ce que des-
sus ie certifie estre veritable, & supplie tres-
humblement sa Majesté me permettre de le
maintenir enuers tous & contre tous, au peril
de ma vie, & pour approbation de ce, i'ay signé
le present acte de ma main signé Roannes.

FIN.

.M17











